

Տեսեալ Հայոց զյայտնի հակառակութիւնս Դատաւորին՝ ազգ արարին նմա լռելեան չվարիլ այնպէս խոտորնակ և չզինիլ ընդդէմ Կայսերական հրամանին, և մի վայրապար համարել զհրովարտակն, զի դատաստանաւ եւ երկար քննութեամբ տուեալ է։ Այլ նա յամառեալ 'ի բանս իւր ասէր՝ թէ աստ վերստին 'ի դատ մուծանեմ, գործակալքն ինձ ոչ ինչ կարեն առնել, արտաքոյ գրոց ոչ գործեմ, զի առաւել քան զամենեւին հմուտ և տեղեակ եմ. վարդապետ Մուվչլլայի և դատասաց պալատականաց առաջի Արքայի՝ և Զինակիր նորին բարեկամ ինձ, որ եւ 'ի միջնորդելոյ նորա ետուն զդատաւորութիւնս վասն գործոյս այսորիկ. նա պատուիրեալ է ինձ չխախիլ 'ի կաշառաց և չխոտորիլ յուղիղ շաւղացն գրոց Արքային չլինի հաւատարմութիւն. այլ զայս դատաստան պարտ է տեսանել օրինօք Շէրիի, և այլ սոցին նման բանք սնտուիք։ Առ որ ասացին Հայք՝ այս գործ օրինօք և դատաստանաւ վերջացեալ է, և չէ գրեալ առ քեզ վերստին դատել, ո՞ր արդեօք ընթերցեալ է ձեր՝ թէ Ս. Տեղիքն Յունաց անկանի՝ եւ Հայոց ոչ. Դատաւորն ասէ՝ որովհետեւ դուք գործակալ բերիք՝ ես արարից զոր ինչ եղեալ եմ 'ի մօրի, եւ նոքա արասցեն զոր ինչ կարեն առնել՝ մեկնեցան 'ի միմեանց։

Դատաւորն կազմեաց Ժողով 'ի Ս. Յարութիւն ('ի 22 Մայիսի) յաւուր տօնի Համբարձման Գրիստոսի, ուր էին և պաշտօնեայք Տէրութեանն. գնացին բազմութեամբ միաբանք Հայոց և Յունաց։ Հարցին ցօյնս, թէ ո՞ք իցեն սեփհական տեղիքն Հայոց. նոքա ցուցանէին մի առ մի՝ Ճարտարապետն չափէր, և Նուրի էֆէնտի դէշէր, նոյնպէս և դպրապետ Դատարանի. Դատաւորն և այլք կային 'ի զննին։ Հայք ասեն. քննեսցի նաեւ թերի մնացեալ և գողացեալ տեղիքն Հայոց 'ի Յունաց։ Աղաղակեցին Յոյնք և Դատաւորն ընդ նոսա թէ՝ չիք հրաման առ այդ յԱրքայէ։ Հայք ասեն՝ այժմ ոչ խնդրեմք զգողացեալ տեղիս մեր առնուլ 'ի Յունաց և տալ մեզ, այլ քննել և նշանակել 'ի գիտութիւն, և յետոյ սպասել հրամանի Արքային։ Դատաւորն չմատուցեալ ունին բանից նոցա սկսաւ կռուիլ և կազել ընդ գործակալս դրդեալ 'ի կուսակցացն Յու-